

1 XOÃO

Merepanika Xoão

Iokanatsopatakiti

Xesosi “Teoso Sãkire” Inakori

¹ Nota iõkatsopata hõte ãkapani, iua “Teoso sãkire” inakori asãpiretini ãkapani. ãtipirika auakari itxaua. Itxãkitakari ikinipoko auãki inini. Itixi kamiko apisa iua aua. Atera kenakotari isãkire. Aõkiã ate atamatari iua. Auakoã amaãtakari iua. Ininiã atãopitika ate imarotari iua. ² Iua ikinipoko auãki inãkitaãkari. Iuaka oerekaua atemoni. Ate imarotapekari iua, ininiã asãpiretai aãtamatakiti, akenakotakiti pakini. Ate sãpiretai hõte iua ãtipirika auakari, kãkiti auãki inãkitaãkari, ininiã kãkiti auapikako Teosokata. Iua Xesosi Kristo inaãka akiritiko. Iua aua irikata, Teosokata. Iuaka oerekaua atemoni. Aãtamatari ãto. ³ Ate sãpiretai hõte aãtamatakiti, akenakotakiti pakini, amoianatakakiniua ãkapani. Atão nisãpiretai. Amoianatakakaua Teosokata, Xesosi Kristo pakinikata. ⁴ Ia sãkiretxiti aiokanata hõtemoni, ãtene hõpoxokoniuatini ãkapani.

Teoso Pokamara Atoko Itxa

⁵ Teoso pokamara atoko itxa, kotxi maerekati ! ikama. Ipiã ! auari Teoso auiniãtaã, kotxi maerekati ! ikama. Ikara iokanapirena imi sãpiretaua ate. Ininiã ate sãpiretai hõte. ⁶ Maerekati akamakasaaki, ipiãã auakani atoko atxa. Iuasaaki, “Teoso amoianata,” aniniã, paxirari

asãkire. Kona atão akamakiti iuasaaki. ⁷ Teoso aua ikamaraã, kotxi erekarinoka ikama. Ate ikamaraã aãuiniã Teoso atoko aniniã, erekarinoka akaminiã, ininiã ate Teoso sãkire auiãkani moianariakori atxaua, ininiã amoianatakakaua. Ikamaraã aãuiniã, Teoso arokaua Xesosi arêkaã. Imakatzakari ikinika maerekati akamakiti, kotxi imi Xesosi Kristo ipina ate ìkapani. Iarêka xikepoakata ate maerekani imakatzakini ìkapani.

⁸ “Na nota kamari maerekati,” aniniã, ateka misirienetaua. Ikara atoko aniniã, ate !imarotari atão Teoso sãkire aãkixinireẽ. ⁹ Amaerekani Teosomoni asãpiretiniã, iua makatzakapitikari amaerekani. Oeretari ate ãkixinire. Imakatzakari ikinipoko amaerekani. Ikamari ikara atoko, kotxi imakatzakaenetari amaerekani. Ikamapitikari ikamaenetakiti. Ikamapikari atão. ¹⁰ “Uatxapiima maerekati ! nikama,” pininiã, pitemoni Teoso sãkire paxirari atxiiti? Kotxi Teoso txapekari kãkiti: “Maerekati kamakari kãkiti.” “Maerekati ! nikama,” pininiã, ! pimarotari Teoso sãkire pãkixinireẽ. !Pikamari Teoso sãkire iaõka iuasaaki.

2

Kãkiti Teoso Atão Imarotakari

¹ Namariteni nota tiretakini atoko hĩtxaua hĩte. Ikara niõkatsopata, maerekati himakamakani ìkapani. Maerekati akamakasaaki, masãpiretari Xesosi Kristo. Aĩri Teoso misãkiretakari itxaua Xesosi. Atão inakarinoka kamakari itxaua iua. Iua misãkiretari Teoso ate ìkapani, amaerekani imakatzakini ìkapani. ² Iua makatzakari maerekati akamakiti. Kona ate maerekaninanini imakatzaka. Ipina ikini itixiti auakani maerekani imakatzakini ìkapani.

3 Teoso paniãtakiti akĩpitiniã, atão aimarotari Teoso. 4 Teoso paniãtakiti makĩpitakati, “Nota imarotari Teoso,” inakari, paxirari isãkire. ãkixinireẽ !imarotari atão inakari Teoso sãkire. 5 Teoso sãkire kĩpitakari iteene tiretari Teoso. Kininiãpa aimarotatari iua nakiti aniniãua? 6 Akamakiti ikiniõtika Xesosi kamakiti atokokana akaminiã, iusaaki aimarotari Teoso nakiti aniniãua. “Teoso nakiti nitxaua,” pininiã, pikamariko Xesosi kamakiti atokokana.

Iteene Matiretakakaua

7 Nitiretakini, Apiananiri paniãtaua atiretakakiniua. Ia paniãtxi niõkatsopatakiti hĩtemoni, kona amaneriikani. Hĩkenakopiretapekari ikara paniãtxi merepitipanika Xesosi sãkire hĩkenakotakasaaki. Iusaaki hĩkenakotari ikara paniãtxi hĩtiretakakiniua tĩkane. Ikara paniãtxi kitxakapirĩkari itxaua. Hĩkenakotapekari ikara paniãtxi. 8 Iuaritika ikara paniãtxi amaneri itxaua. Xesosi kĩpitari ikara paniãtxi, kotxi itiretari kãkiti. Hĩte apaka tiretari kãkiti, ininiã aimarotari ikara paniãtxi ereka inini. Ininiã ipiã napaãpota, kotxi kãkiti imaroãpotari atão Teoso sãkire. Atão inakari kãkiti imarotakasaaki, pokamarari atoko itxa kãkiti ãkixinireẽ.

9 “Pokamara naua,” pininiã, txamari iusaaki pomanatari pitari Xesosi sãkire auiãkari, ikara atoko pininiã, uatxapiima ipiã pauapanika. 10 Pitari Xesosi auiãkari pitiretiniã, pokamara pauapitika. Ininiã erekari pãkixinire, ininiãkara pãkixinireẽ auakari kona txĩkitakai maerekati pikamini. 11 Pitari Xesosi sãkire auiãkari pomanatiniã, ipiã auakari atoko pitxaua.

Iuasaaki pitĩpokotapika ipiaã. ! Pimarotari pisinimoni. Mõsiãreti atoko pitxaua, kotxi ! apakata patamarauatini ipiã xika.

¹² Namariteni nota tìretakini, niõkatsopata hĩte ĩkapani, kotxi Xesosi makatzakapekari himaerekani, kotxi kãkiti maerekani makatzakakari itxaua.

¹³ Hĩte irĩtxiakoripekana, niõkatsopata hĩte ĩkapani, kotxi hĩte iteene imarotari Xesosi, itixi kamikosaaki auapeka inakari.

Hĩte ãtokoriakoripekana, niõkatsopata hĩte ĩkapani, kotxi homitikapekari Satanasi hĩtapararitika.

Namaritenipekana, niõkatsopata hĩte ĩkapani, kotxi himarotari aĩri Teoso.

¹⁴ Hĩte irĩtxiakoripekana, niõkatsopata hĩte ĩkapani, kotxi himarotari Xesosi. Itixi kamikosaaki auakaripeka itxaua.

Hĩte ãtokoriakoripekana, niõkatsopata hĩte ĩkapani, kotxi pataparari hãkixinire. Teoso sãkire auapika hãkixinireẽ. Homitikapekari Satanasi hĩtapararitika.

!Hĩnirekapiri Itixi Auakani Nireẽkiti

¹⁵ Itixi auakani nireẽkiti atoko inakari ! hinirekape, kotxi ninoa nirekari maerekati ikaminina. Hĩtìretiniãri ninoa kamakiti, !hĩtìretari aĩri Teoso. ¹⁶ Maerekati kãkiti kamakiti ia atoko itxapaniko: Inirekarina maerekati iĩtona nireẽkiti ikaminina. Inirekarina maerekati okina nireẽkiti ikaminina. Iuikauana, katii ininiãuana. Iuikarina ikamakitina. Ikara maerekati kãkiti kamakiti potorika ĩkorapokoriti. Kona Teosomonikirini ikara. ¹⁷ Itixi xipokako. Ikinipoko tiitxi kãkiti nireẽkiti apaka xipokako. Kãkiti Teoso nireẽkiti kamakarirako !ixipoka. Auapininiika Teosokata.

Kristo Omanatakani

¹⁸ Namariteni nota tiretakini, itixi xipokini òti katanapanoka apoka. Kristo omanatakani auĩte apokako itixi xipokini òti apisa. Ikara himarotapeka. Uatxa Kristo omanatakani itomane apokapeka. Ikara atoko ininiã, aimarotari itixi xipokini òti takotepeka inini. ¹⁹ Ninoa Kristo omanatakani, mitxi atekata apotiitaua, Teosokata aãpotiitakasaakia. Txamari ninoa !auikari Xesosi sãkire ate auikiniri atokokana, ininiã ninoa sipe. Ninoa atão Xesosi sãkire auikaãkamako, atekata ikaikotapikamanako. Itakanapaua, kotxi ate auikari Xesosi sãkire. Ninoa !auikari.

²⁰ Teoso, erekarinoka kamakari, sikapekai hĩte Erekarĩ Matamatakoti himoianari tĩkane. Ininiã hĩte imarotari atão inakari Xesosi sãkire. ²¹ Hĩte imarotari atão inakari Xesosi sãkire, iuaritika niõkatsopata hĩtemoni. Niokanatsopata hĩtemoni, kotxi himarotari atão inakari. Paxiene kamakari ! imarotari atão inakari sãkiretxiti.

²² Natokopa itxa iua paxiene kamakari? Paxiene kamakari txari: “Xesosi kona Teoso mereẽkitini.” Kãkiti ikara atoko inakari Kristo omanatakari itxaua iua. Iua !inirekari aĩri Teoso. Imi apaka !inireka. ²³ “Xesosi kona Teoso ãkirini” inakari, na kaikota Teosokata. “Teoso ãkiripitikara Xesosi” inakarirako kaikotapitikako Teosokata.

²⁴ Hãuiritariko merepitipanika Xesosi sãkire hĩkenakotakiti kaikotini hãkixinireẽ. Ikara kaikotiniã hãkixinireẽ, Teoso ãkirikata hĩkaikotapikako. Aĩri Teosokata hĩkaikota apaka. ²⁵ Xesosi sikaenetapekua aãuapininiika anini Teosokata.

²⁶ Niõkatsopata hĩte nõtãkikini ĩkapani, kotxi aua kãkiti Xesosi hĩtakanapini nireẽkani. ²⁷ Erekarĩ

Matamatakoti, Xesosi sikakiti, auapanika hĩte ãkixinireẽ, ininiã hĩte na nirekari ãti koerekareri. Iua Erekarĩ Matamatakoti oerekai ikinipoko. Iua oerekakiti atãopitika. Kona paxieneni iua. Ininiã hĩkaikotako Xesosikata, Erekarĩ Matamatakoti oereẽkiti hĩkĩpitini.

²⁸ Ininiã namariteni nota turetakini, himoianatapikariko Xesosi. Ininiã uaimoni ikanapiriãkasaaki, hĩpĩkarauatini ! auari. Ininiã na hĩpẽtauata haõkitakasaakiri iua. ²⁹ Xesosi kamari atão inakarĩnoka. Ikara himarotapeka. Ininiãkara himarotari, kãkiti atão inakarĩnoka kamakani Xesosi anaakori ininiuana.

3

Teoso Anaakori

¹ Aĩri Teoso iteene turetatau ate. Hĩxinikariko iua tiraõki. Iua iteene turetatau ate, ininiã, “Namariteni,” itxaua ate. Ari, atãopitikara Teoso anaakori atxaua. Ninoa Teoso anaakori minakanua ! auikari Teoso anaakori aniniua, kotxi ninoa !imarotari Teoso. ² Nituretakini, Teoso anaakori atxapekaua uatxa. Eereka !aimarotari kanatokoako atxapaniko. Ia aimarotapitika. Xesosi kanapiriãkasaaki, Xesosi atoko atxapekauako, kotxi iusaaki aãtamatariko iua. ³ Kãkiti ikara auiãkani, !inirekarina maerekati ikaminina, kotxi Xesosi !ikamari maerekati.

⁴ Maerekati kamakari ! ikamari Teoso paniãtakiti. Amakamakanisaakiri Teoso paniãtakiti, iusaakipeka akamari maerekati.

⁵ Himarotari Xesosi apokapeka ãkorapokoriti maerekati akamakiti imaktxakini ãkapani. Xesosi ! ikamari maerekati. ⁶ Kãkiti Xesosi ãtipirika

moianatakari ! inirekaikari maerekati ikamini. Iua ãtipirika maerekati kamakari ! aõkitapanikari Xesosi. !Imarotapanikari Xesosi.

⁷ Namariteni nota tiretakini, ! hãuritapiri apanakini misirienetini hĩte. Atão inakaranoka kamakari kamapitikari Teoso nireẽkitinoka, Xesosi kaminiri atokokana, kotxi Xesosi kamari atão inakaranoka. ⁸ ãtipirika maerekati kamakari Satanasi nakiti itxaua, kotxi Satanasi kamapikari maerekati. Itixi kamikosaakipekara ikamaãpokatapitiporiri maerekati. Uatxa ikamapanikari. Teoso ãkiri apoka ãkorapokoriti maerekati Satanasi parĩka ixipokini ãkapani.

⁹ Teoso anaakori ! inirekaikari maerekati ikaminina, kotxi Teoso aua ãkixinireẽna. Ininiã ! iposotarina maerekati ikamaãpotinina, kotxi iritarina Teoso. ¹⁰ Ininiã kipa Teoso anaakori txataua? Atão inakaranoka kamakanira Teoso anaakori txaua. ãti tirketakanira Teoso anaakori txaua. Ininiã kipa Satanasi anaakori txataua? Erekarĩ makamakanira Satanasi anaakori txaua. ãti matirketakanira Satanasi anaakori txaua.

Kãkiti Tirketakiniua Pirena

¹¹ Matirketakaua. Merepitipanika Xesosi sãkire hĩkenakotakasaaki, hĩkenakotari ikara õtãkipirenatxi, hĩtirketakiniua. ¹² Kaiĩ inakori atoko ! hĩtxape. Maerekatinoka kamakari nakiti itxaua iua Kaiĩ. Satanasi nakiti itxaua. Kaiĩ okari atão itarika. Kixikapa okari? Ixikotiniri xika okapiri, kotxi itari kamari erekarinoka. Kaiĩ kamari maerekatinoka.

¹³ Nitariakori, Xesosi sãkire mauiãkani omanatakasaakii hĩte, !hĩtsorĩkaãtapeko. “Kixikapa ninoa omanataua ate?” !hĩtxapeko, kotxi ikara

atoko inakari apokapitikako. ¹⁴ Atiretiniãri aĩtariakori Xesosi sãkire auiãkani, aimarotari ! apinaika. Aãuapininiika Teosokata. Matiraõkiti ãkixinire ipĩkari atoko itxa. ¹⁵ Kãkiti itari omanatakari, Xesosi sãkire auiãkari omanatakari, kokaniri atoko itxaua. Himarotari kokaniri !auari ãtipirika Teosokata.

¹⁶ Xesosi Kristo ipina amaerekani imakatzakini ĩkapani, ãtipirika Teosokata aãuini ĩkapani. Ikara oerekaua atão tiraõkitxi. Ininiã erekari aĩtariakori atiretini. Xesosi tiretiniua ate atokokana, erekari atiretiniri aĩtariakori. Atxiĩti apina aĩtari mapinakani ĩkapani. ¹⁷ Pitii, pikiena pakini auiniãi, pitari, Teoso sãkire auiãkari tii, ikiena pakini mauakaniã, pisikariko iuamoni. Pimasikakaniãri iuamoni, Teoso tiraõki pãkixinireẽ !auari. ¹⁸ Namariteni nota tiretakini, “Apanakini ate tireta,” atxaua, txamari kaamoni inakasaakina na asikana minakati, ininiã na atão atiretana. Atão matiretana apanakini. Kaamoni inakasaakina, masakana ninoã amonitakitina.

Teoso Sãkire Kĩpitakari

¹⁹ Ikara atoko akaminiã, aimarotari Teoso anaakori aniniãua. Aimarotari atão inakari sãkiretxiti akĩpitini. Ikara atoko akaminiã, erekapitikari aãkixinire. Ikara atoko akaminiã, !apĩkari Teoso amisãkiretini. ²⁰ “Kona erekano,” pininiã pãkixinireẽ, mitxi pimaerekani pikamini xika, !pipĩkarauatape, kotxi Teoso iteene imarotai, iuaritika iteene iamoniãkai. Poiãoka aimarotari aãkixinireẽ auakari. Teoso imarotari ikinipoko.

²¹ Nitiretakini, pãkixinireẽ: “Namanaãpekari Teoso imakinika nimaerekani imakatzakini,” pininiã, kataparaxinirepitikai Teoso

pimisãkiretini. ²² Ininiã iua sikaua aamanaãkiti, kotxi ate kamari ipaniãtakiti iaõka. Iua apokaerekatakitinoka akama. ²³ Teoso paniãtaua ate: “Hãuikariko namarite Xesosi Kristo sãkire.” Apaka Teoso paniãtaua: “Hĩtiretakakauako.” Teoso paniãtaua ikara akamini. ²⁴ Teoso sãkire iaõka kamakari kaikotapika Teosokata ãtipirika. Teoso kaikotapika iuakata ãtipirika apaka. Aimarotari Teoso kaikotini atekata, kotxi iua sikaua Erekaru Matamatakoti aãkixinireẽ auini ĩkapani.

4

Atamakaerekarauatini

¹ Nitiretakini, !hãuikapiri ikinimane kãkiti sãkire, “Erekaru Matamatakoti aua nota ãkixinireẽ,” inakani. Hãtaerekatanako ninoa. Atão Erekaru Matamatakoti auatana atxiĩti ãkixinireẽna? Atxiĩti matamatakoti ãkixinireẽna auakari kona Teosomoni ĩkarini. Itomaneri kãkiti, “Nota Teoso sãkire sãpiretakarino,” inakani, txamari na atão ninoa sãkire. Kãkiti ninoa atoko inakani aua ĩkini itixitika. !Isãpiretarina atão Teoso sãkire. Imisirienetarina kãkiti. ² Kãkiti sãpiretiniãua: “Teoso ãkiri Xesosi Kristo apokapeka ĩkorapokoriti. Kãkitipeka itxaua,” ininiã iuasaaki aimarotari Erekaru Matamatakoti auapitika iua ãkixinireẽ. Ikara atoko aimarotari Erekaru Matamatakoti Teoso sikakiti auaĩtotiniri kãkiti. ³ Kãkiti sãpiretiniãua: “Xesosi na atão kãkiti ! itxaua,” ininiã iuasaaki aimarotari Erekaru Matamatakoti ! auari iua kãkiti ãkixinireẽ. Matamatakoti iua kãkiti ãkixinireẽ auakari Satanasi nakiti itxaua. Kristo omanatakari nakiti itxaua. Iua Erekaru Matamatakoti Teoso nakiti itxaua. Hĩkenakopiretapekari: “Maerekati Matamatakoti

Kristo omanatakari iokanatakiti apokapitikako ïkorapokoriti,” itxa. Uatxa apokapeka.

⁴ Hïte namariteni, Teoso nakitiakori hïtxaua. Ininiã hïte !auikari atão minakati sãpiretakani sãpiretakiti, kotxi Erekarî Matamatakoti hïte ãkixinireẽ auakari apia posotiireri itxaua iua. Maerekati matamatakoti, Xesosi sãkire mauiãkani ãkixinireẽ auakari, kaposotiireri itxaua, iuaritika Erekarî Matamatakoti hïte ãkixinireẽ auakari apia sikaimaroretai hïte.

⁵ Ninoa atão minakati sãpiretakani xinikakiti, itixi auakani xinikakiti atoktxikana, ininiãkara itixi auakani auikari ninoa sãkire. ⁶ Atepekana, Teoso nakitiakori atxaua. Teoso imarotakari auikari asãkire. Teoso nakiti minakatïua !auikari asãkire. Ininiãkara aimarotari kãkiti Erekarî Matamatakoti auaãkixiniretakini. Iua Erekarî Matamatakoti atãonoka isãkirauata. Aimarotari kãkiti ãti matamatakoti auaãkixiniretakini. Iua ãti matamatakoti kamisirienereri itxaua.

Teoso Tiraõki

⁷ Nitiretakini, matiretakakaua, kotxi tiraõkitxi Teosomoni potoricakari itxaua. Katiraõkirini Teoso anaakori itxauana. Ninoa atão imarotari Teoso. ⁸ Matiraõkiti !imarotari Teoso, kotxi Teoso tiraõkiuatapika. Tiraõkitxi Teosomoni potoriãkari itxaua. ⁹ Teoso iokanatarî imatonõkari imi atemoni, Teosokata ãtipirika aãuini ïkapani. Ikara atoko ininiã, Teoso oerekaua itiretiniua. ¹⁰ Ikara tiraõkitxi atão inakari itxaua. Mitxi ate !atiretari Teoso. Iuaritika iua tiretaua ate, ininiã iokanatarî imi atemoni ipinini ïkapani, maerekati akamakiti imaktxakini ïkapani.

¹¹ Nitiretakini, ikara atokorako itxa Teoso tiretiniua, ininiã matiretakakaua. ¹² !Auari Teoso atamatakari, iuaritika Teoso auari aãkixinireẽ, atiretakakiniãua. Ininiã Teoso oerekaua atão atiraõkiuatini.

¹³ Aimarotari Teosokata akaikotini ãtipirika. Aimarotari Teoso ãtipirika kaikotini atekata. Aimarotari ikara atoko inakari, kotxi iua sikari Erekaru Matamatakoti atemoni. ¹⁴ Aãtamatapekari Xesosi kamakiti. Akenakotapekari isãpiretakiti. Ininiã asãpiretari ikinimane, aãri Teoso iokanataru imi kãkitimoni, amaerekani makatxakakari ininiua ãkapani, kãkiti ãtipirika Teosokata auini ãkapani. ¹⁵ “Xesosi Teoso ãkiripitikara,” ina sãkiretakani, Teoso kaikotapika ninoakata. Apaka ninoa kaikota Teosokata ãtipirika. ¹⁶ Aimarotari Teoso tiretiniua. Aãuikapiretapitikari Teoso tiretiniua.

Teoso tiraõkiuatapika. Kãkiti katiraõkiri kaikota Teosokata ãtipirika. Teoso kaikota ãtipirika iuakata apaka. ¹⁷ Teoso oerekapekaua atão atiraõkiuatini iua tiraõkiuatini atokokana. Ininiã kataparaxinireua Kristo apisatoõ aãpokasaaki, kãkiti misiritiko õtisaaki. Aimarotari !imisiritaua iusaaki, ininiã kataparaxinireuako, kotxi ãkorapokoriti aãuakasaaki Kristo atoko atxaua. ¹⁸ Atiraõkiuatakasaaki, ! apãkarauata. Atão atiraõkiuatiniã, !auari apãkare. Apãkarauatakasaaki, amaãkaua.

¹⁹ Atiretari Teoso, kotxi mitxipeka iua tiretaua ate. ²⁰ Iua itari omanatakari, “Nota tiretari Teoso” ina sãkiretakari, paxirari isãkire. ! Itiretari itari iuakata auakari. Ininiã !iposotari itiretiniri Teoso

imaõkitakiniti. ²¹ Ininiã Teoso paniãtaua: “Teoso tiretakari tiretariko itari apaka.”

5

Teoso ãkiri Auikiko

¹ Xesosi Teoso mereẽkiti itxaua. Ikara auiãkani Teoso anaakori itxauana. Aĩri Teoso atiretiniã, aĩtariakori apaka atireta, kotxi Teoso anaakori ninoa apaka txaua. ² Teoso atiretiniã, inireẽkiti iaõka akaminiã, aimarotari Teoso anaakori apaka atiretini. ³ Teoso atiretiniã, akĩpitari ipaniãtakiti. Aposotari akaminiri ipaniãtakiti, kotxi na kamimari ipaniãtakiti. ⁴ Aposotari akaminiri iua paniãtakiti, kotxi iua anaakori atxapekaua, ininiã isikataparataua, maerekati itixi auakani nireẽkiti amakamakani ĩkapani. Kininiãpa isikataparataua maerekati ninoa nireẽkiti amakamakani ĩkapani? Isikataparataua, kotxi Xesosi sãkire aãuika. ⁵ Kipa posotari maerekati itixi auakani nireẽkiti imakamakani? Kãkiti auikiniãri Xesosi Teoso ãkiri ininiãua, iuanokara posotari maerekati imakamakani.

⁶ Xesosi Kristo Teoso ãkiri itxaua. Teoso oerekapekaua Xesosi iua ãkiri ininiãua. Kãuaãriã Xesosi patxisatikosaaki isãpiretaua. Iuaĩkana Teoso sãpiretaua Xesosi iua ãkiri ininiãua, Xesosi ipĩkasaaki iarẽka ixikepoatakasaaki. Teoso sãpiretaua kona Xesosi patxisatikosaakinanini. Iua oerekaua Xesosi Teoso ãkiri ininiãua ipĩkasaaki apaka. Erekaru Matamatakoti sãpiretaua Xesosi Teoso ãkiri ininiãua. Iua atãonoka isãkire. ⁷ Teoso tixini auakani ipi, ãti pakini oerekaua Xesosi Teoso ãkiri ininiãua, aĩri Teosoma, “Teoso Sãkire” inakorima, Erekaru Matamatakotima pakini.

Naia ipi, āti pakini ātinoka. ⁸ Īkorapokoriti auakani ipi, āti pakini, Erekarī Matamatakotima, Xesosi patxisatikoma, Xesosi ipininima pakini oerekaua Teoso ākiri ininiāua Xesosi. ⁹ Kākiti erekarini sāpiretakiti aāuikapitika, ininiā apiata maāuikari Teoso sāpiretakiti, kotxi atāonoka isākire. Iuara sāpiretaua Xesosi iua ākiri ininiāua. ¹⁰ Teoso ākiri auīākari ākixinire imarotari ikara Teoso sāpiretakiti atāo inini. Teoso sāpiretakiti mauīākati txari: “Paxirari Teoso sākire,” kotxi ! auikari Teoso sāpiretakiti Xesosi iua ākiri ininiua. ¹¹ Kiripa Teoso sāpiretaua? Iua sāpiretaua: “Nitxīkitakai auāki hinini notakata hāuapininiika hinini tīkane. Ikara atoko nitxīkitakai namarite nakitiakori hinakasaakia.” ¹² Iua Teoso ākiri nakiti Teosokata ātipirika auako. Iua Teoso ākiri nakiti minakatiua, ! auapani ātipirika Teosokata.

Aāuini Ātipirika Anini Tīkane

¹³ Hīte auikari Xesosi Teoso ākiri ininiua. Niokanatsopata hītemoni, Teosokata ātipirika hāuini himarotini īkapani. ¹⁴ Teoso nireēkiti atokotxikana aamananiāri Teoso, aimarotari ikenakotari amisākiretiniri, ininiā kataparax-inirepitikaua amisākiretiniri, kotxi aimarotari iua apakapapiretapitikaua. ¹⁵ Ikara atoko aniniā, aimarotari ikenakotari aamanaākiti, ininiā isikapitikaua.

¹⁶ Himarotakasaakiri pitari kaminiri maerekati, himisākiretari Teoso iua īkapani. Ininiā Teoso makatxakari maerekati ikamakiti. Teoso kamari iua ātipirika iuakata auini īkapani. Ikara maerekati makatxakiko auapitika, ininiā kona itxīkitakari iua xinire ipinini. Ātiāo maerekati

kãkiti kamakiti aua. Ikara maerekati makatxakiko ! auari, ininiã itxĩkitakari kãkiti xinire ipinini. Nota ! õtãkikai himisãkiretiniri Teoso ikara atoko inakari maerekati kamakari ãkapani. ¹⁷ Teoso paniãtakiti amakamakaniã, iuara maerekati txaua. Iuaritika aamanainiãri Xesosi ikara maerekati imakatzakini, ininiã ikara maerekati litxĩkitakari kãkiti xinire ipinini.

¹⁸ Teoso anaakori atão inakani ! inirekaikari maerekati ikaminina. Aimarotari ikara. ! Inirekaikarina maerekati ikaminina, kotxi Teoso ãkiri nĩkatana ninoa. Ininiã maerekati auĩte Satanasi ! iposotari imisiritinina.

¹⁹ Ikini itixiti auakani auĩte itxaua Satanasi, maerekati kamakari. Iuaritika aimarotari Teoso anaakori aniniua ate.

²⁰ Aimarotari, Teoso ãkiri apokapeka ãkorapokoriti. Aimarotari iua sikaua imarore, ininiã aimarotari Teoso atão inakari. Akaikota iua atão inakarikata. Ari akaikota imi Xesosi Kristokata. Teoso atão inakari itxaua iua. Itxĩkitakaua iuakata atipirika aãuini.

²¹ Namariteni, nota tirketakini, ! hĩteosonetapiri Teoso minakatiua. Ameẽ.

Teoso sãkire amaneri
New Testament in Apurinã (BR:apu:Apurinã)

copyright © 2004 Wycliffe Bible Translators, Inc.

Language: Apurinã

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apurinã

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files
dated 29 Jan 2022
253eaec7-f0c7-5b49-b6be-65ee5354d0ed